

長樂縣志卷十六

列傳五

忠義

節概

孝弟

鄉行

文苑

隱逸

流寓

此卷名目悉因舊志忠義與節概何分孝弟與鄉行何別揆其用意殉國難者為忠義樹氣骨者為節概孝弟修於家庭鄉行施於閭黨目雖瑣屑義亦分明偶有斷限不清今卻悉為釐正至於文苑一傳義當標舉文辭果有馬揚之才豈宜略夫箴賦素擅鸞鳳之譽何至不見羽毛苟屬空言即難濫廁其隱逸流寓諸君子或棲遲空谷或羈滯此邦蹤跡所留山川生色皆攷古者所不遺也作忠義諸傳

忠義 宋

長樂縣志

卷十六

列傳五

一

忠義

陳文龍字君賁號德雲原籍莆田幼隨父遷邑之后山家焉咸淳四年廷對第一由鎮東節度判官歷監察御史先是臺中有建白皆呈稟賈似道文龍獨否似道不悅出知臨安府襄陽圍急似道陽請督師無行意襄陽遂陷文龍疏論其罪又言范文虎當罰而賞趙潛乳臭子黃萬石怠荒皆不勝任似道怒黜罷之未幾元兵東下文虎首迎降似道兵潰魯港潛最先遁度宗始悔不用文龍言起為左司諫遷侍御史時邊事急王爚與陳宜中不相能文龍疏曰書稱三后協心同底於道北兵今日取某城明日築某堡而我以文相遜以迹相疑譬猶拯溺救焚而徐行安步也請召大臣同心圖治無騰虛說累遷參知政事而元兵已至杭北關外眾議降



文龍乃上章乞歸養既復求還不報德祐丙子益王卽位福州復以文龍參知政事元兵至福州益王趨廣文龍以前官充閩廣宣撫大使殫家財募兵萬人卽興化軍開闔已而元兵入廣建甯泉福皆降知福州王剛中遣使徇興化文龍斬之元人來攻不克使其姻戚持書招諭文龍焚書斬使遣將林華偵伺境上華亦降元導兵至城下通判曹澄孫開門降執文龍與其家人至文炳軍中不屈左右凌挫之文龍指其腹曰此皆節義文章也可相逼耶引就館元帥唆都往來諭意且以母老子幼感動之文龍曰我家世受國恩萬無降理母老且死先皇三子歧分南北我子何足關念情詞慷慨唆都愀然改容乃械送杭州不食死其母病繫福州尼

長樂縣志

卷十六

列傳五

二

忠義

寺中左右視之泣下母曰吾與吾兒同死又何恨哉亦死訃聞詔謚忠肅賜廟號昭忠元至正閒遣使李文虎至郡訪求陳文龍子孫將錄用無一應者

參通志

陳瓚字瑟玉文龍從子也少有大節知天下必亂無意仕進散粟出帛以濟饑寒曰吾世受國恩當爲國收人心耳文龍起參知政事瓚獻策曰今天下已危莫若勸上悉召四方兵分屯沿江要害敵來併力以戰猶可爲也文龍憮然曰策甚善柄國非人恐不能用是行也吾必死之德祐丙子端宗趨廣瓚出家財三百萬緡航海助餉張世傑欲授以官瓚曰某激忠義而來豈買爵耶辭歸十二月叛將林華陳淵與通判曹澄孫以城降元文龍被執北去瓚陰



部署賓客募丁壯攻林華等誅之復興化軍端宗嘉其忠義命以通判權守興化元峻都來攻瓚號令嚴整每巡城必南面號勸士皆感奮逾月力不支被執峻都欲降之大罵不屈峻都怒車裂以殉事聞贈兵部侍郎諡忠武子若水世傑辟為督府架閣參通志夏志論云陳德雲以廷元死忠節其不負科名何愧文信國且從子瓚能繼其志亦以忠死爭光日月矣舊志乃軼不載然則忠臣烈士湮沒簡編之外者何可勝數哉並祀忠義祠

○按通志以瓚為文龍叔今依宋史改正

楊夢斗字子仰號山甫東渡人以文章起家寶祐四年同兄琦弟叔濟姪次鄭登文信國榜進士官揚州都統使鎮服夷曾與琦叔濟次鄭分守要隘景炎末宋室播遷從文信國力抗元兵敗不屈赴

揚子江死里人立祠祀之扁其額曰文章節義邑祀忠義祠參通志夏

### 長樂縣志

#### 卷十六

列傳五

三

忠義

志論云楊公死難事甚烈傳夢於故里父老眾共祀之特為建祠以承祀公斯固異矣余志已告成諸生林日儁高熹在屢夢公促余志其忠烈事且云大戰難守大敗不辱又云忠肝烈膽南州得失詎不關心蓋余傳公於神祠而未傳公於忠烈誠為失之兩生大雅士非誕言者公之大節固當與文信國並衡而三以夢著忠魂未散日月為光尤異也哉余既為傳復系以詩詩載藝文

陳公榮字子華龜圖十三世孫初遊太學景炎元年元兵入寇徵兵勤王無有應者榮破產募兵謁文丞相共圖興復丞相喜薦授福清知縣時蒲壽庚以城降元榮同子宗傳姪老成會張世傑討之宗傳老成戰死偕死者百七十人事聞贈宗傳提刑簡法老成御史臺簡法一切祭葬各有差榮臨終戒族人無事二姓故終元之世無一人附宦籍者明興科第聯遂為吳航甲族祀本里三忠

祠榮有挽從子老成詩及宗傳從軍行並載藝文志○參通志



高應松字箕畝與頭人開慶元年進士由衡州教授通判廣德軍召  
爲國子監丞擢禮部員外郎翰林院權直元兵至臨安挾宋降應  
松不肯草降表兵入湧金門舉朝奔竄從官留者九人應松與同  
郡翁仲德陳春信郭珙與焉朝廷旌其忠遷中書舍人直學士院  
尋擢工部侍郎進端明殿學士簽書樞密院參知政事及兩宮赴  
北應松扈從至燕絕粒七日卒著有箕畝策集郡邑並祀參閩書

陳覺伯字宗尹如晦子咸淳七年進士夙承庭訓與高應松友善教  
授泉州以古道迪士景炎初幼主航海舟次泉州港覺伯率同列  
表間起居命攝州倅扈從入廣拜福建提刑數月罷歸閩厓山師  
潰憤惋不食卒遺命其子曰吾宋臣也題墓當係吾於宋應松弟

長樂縣志

卷十六

列傳五

四

忠義

旂爲撰墓銘參閩書

明

黃銅字孔鑄青山下人英勇明決里有福安寺僧恃富囂訟爲虐於  
鄉銅年十三能以計除之中洪武庚午舉人選廣西僉司升光州  
守會靖難師起密詔戒諸將毋殺皇叔父銅憤且泣曰惡有不殺  
而可以禁攻寢兵者乎吾當奮死爲之違旨滅族非所計也及舟  
戰親持矛入燕王舟不中而蹶復陸戰以不善馬被獲長笑而死  
參通志並黃氏家譜○夏志論云銅事甚列前志以事類斬法置  
不錄然成祖有言練子甯若在固當用之何得諱銅事不傳哉

王恩及字戴君號澹侯羅仙人少端莊不屑與羣兒伍從師肄業山  
庄階前忽出竹筭一晝夜光齊几上恩及顧笑曰大丈夫氣節勁



直不回不當若是耶平日閱忠臣孝子義夫節婦傳輒流連向往  
之天啓辛酉嘉興譚學使拔取第一領是秋鄉薦崇禎癸未謁選  
令廣東信宜縣地界兩粵萬山中夷獠雜處勉力撫綏恩威互用  
不期月風俗頓更甲申後四郊多寇恩及集壯丁捍禦閒出勦賊  
躬冒矢石縣賴以完當事才之隆武乙酉召赴行在欲破格擢用  
唐王旋出駐延建恩及從閒道歸養老母身負坏土經營先墳中  
林得毒草藏以備用丁亥秋魯王監國召爲監察御史猶正色立  
朝時事棘且殆毫無忿鬱不平之氣戊子夏五與妻李氏同仰藥  
死 國朝乾隆四十一年 予諡節愍 參舊志及謝  
果節義錄

高飛聲字克正十九都流水人好學性嚴毅崇禎癸酉舉人知江西

長樂縣志

卷十六

列傳五

五

忠義

玉山縣有巨寇據險久莫能制飛聲躬搗其巢平之尋擢撫州同  
知以母老乞歸後因明亡死之 國朝乾隆四十一年予諡節愍

參舊志及謝  
果節義錄

陳翔字克理長祚孫崇禎癸未進士授中書舍人時國家多難大學  
士黃景昉假歸翔奉命催起景昉堅不赴召得旨以陳翔奉差不  
力該部嚴議處旋闖賊陷京都翔抗節不屈備受夾拷後慟哭南  
旋負重傷卒識者謂其死於忠也弟審字克乙兆熙字克時兆鼎  
字克重隱居不仕均以節終子殿邦順治甲午舉人逆耿迫召避

地福清後官陝西延安府同知 參黃景昉奏稿  
及陳氏家譜

陳家麟字恭夫邑諸生恂恂儒素言行謹恪族中科甲三百年來盛



冠一郡甲申後痛國運淪喪常鬱鬱不自得丁亥閒沿海義兵遍起家麟喜曰此吾致命日也大事濟否固知有天安能效兒女子逡巡不出貽終天恨哉結義勇百餘鼓行而進家業不踰中產罄所有以佐軍無援死之

參謝杲節義錄

林逢經字守一號鐵崖大父世章嘉靖乙丑進士官工部郎中父裕陽萬厯丙子舉人官雲南臨安知府逢經幼聰敏博洽多才年十四補諸生尋食廩餼松江夏允彝知縣事與結文字契福州改元三事交薦授誥勅撰文中書舍人旋兼司經局正字翰林院五經博士轉兵部武選司主事改翰林院簡討預修毅廟實錄時勳鎮跋扈官方無序逢經封章屢上或勸其職非諫員何必曉曉賈禍

長樂縣志

卷十六

列傳五

六

忠義

經曰傳云孔父正色而立於朝則人莫敢過而致難於君者吾海濱男子累世承恩恨無可報稱目此狗鼠輩弁髦至尊豈忍箝口不言甘同寒蟬聞者心折丙戌秋披緇入山廬於臨安君墓下除夕賦詩一字一淚丁亥起原官兼監軍監察御史朝夕兢兢忠勇奮發戊子夏大衆奔竄逢經曰吾天朝近臣不敢草草昇籃輿抵松下赴海死宗子日昂撈尸未獲夜夢逢經含笑語曰吾已歸海中矣及旦覓水濱得之面如生逢經出黃石齋門與曾弗人李元仲相友善早歲便有天下己任志當啓禎閒見任用非人輒咨嗟太息或聞正人死疆場殉王事則悲憤交集世之論者僅目經爲淹博宏才孰知其一腔熱血迥出類萃惜未展施行遂所志著有



苦竹吟諸集 國朝乾隆四十一年予謚節愍參謝杲節義錄

李上林字大材號覺早十七都仙山人明亡死之舊志

陳颺言字孝嘉周山人國學生明亡殉難舊志

陳獅字克 號雲生古縣人以祖長祚蔭官前府都事歷工部員外

郎中轉尚寶司少卿大僕寺少卿順治七年 大兵下廣東入桂

林永明王由肇慶奔梧州轉南甯獅終始隨奔走鋒鏑中叠受刀

刃負傷至潯卒友人劉伯玖轉徙七載負遺骨歸著有海霞詩集

子億正志友梓行於世參明史及黃處安和敬堂集

國朝

邱能成坑田人遷居省城由行伍出身任臺灣鎮右營遊擊乾隆五

長樂縣志 卷十六 列傳五 七 忠義

十一年征勦逆匪林爽文打仗陣亡 詔賜卹如例祀昭忠祠

邱安國坑田人遷居省城由行伍出身任福甯鎮標中營千總乾隆

五十二年土寇林爽文肆擾臺灣國奉調赴臺進勦與賊接仗陣

亡 詔賜卹如例祀忠義祠

池劍波字大鯨別字秋如舊池人家會城籍閩縣尚節概能文章癸

卯省元乙巳進士權江西貴溪縣丙午鄉試分校得士最盛自以

才力不及改就教職補興化府教授調臺灣任滿內渡宦橐蕭然

同治三年補漳州府教授到署甫五日而粵匪突至士民驚散官

軍亦潰城陷罵賊不絕口賊以繩繫其項劍波厲聲曰頭可斷項

不可繫遂被戕後六日賊退家人檢積尸中負遺骸歸 詔賜卹



如例祀省昭忠祠

黃榮庚原名良彩字子章一字星舫明光州太守銅十六世孫也幼有至性覽其先世忠烈傳輒涕零道光癸卯舉於鄉留京師者七年刻意勵行以文章節義自期鄉先達王文勤目爲遠到之器中庚戌二甲進士卽用江西王子分校鄉闈所拔多宿學士歷署豐城定南地遭兵燹戶多流亡榮庚勞來安集平獄訟靖萑苻士民德之以定南守城出力加同知銜賞戴藍翎旋授龍南令調署大庾縣事時粵匪正熾榮庚請守隘以遏賊氛太守不從請兵又不從喟然嘆曰吾固與城爲存亡耳其如生靈何已而賊匪麋至內無重兵外無援卒祇恃忠義所積激厲人心卽婦女亦知登陴禦

長樂縣志

卷十六

列傳五

八

忠義

賊效死勿去固守十晝夜卒爲地雷所轟城陷帥眾巷戰身受重傷帶創歸署囑其兄兆庚速去曰歸事老母毋以我爲念吾將從先銅公於地下矣遂與其妾馮氏仰藥恐不死復偕縊時咸豐八年十一月三十日也榮庚平日恂恂若無異人及義所當爲則毅然不可奪古所謂殺身成仁者殆庶幾焉著有考訂孔孟年表儀禮精華 詔以知府卹贈賜祭葬祀忠義祠世襲雲騎尉子以荃邑諸生

楊鵬南字翼季集星橋人居會城由行伍補軍標把總咸豐癸丑三月順昌土寇四出劫掠監司胡應泰請兵捕勦巡撫王懿德檄參將李煌督兵赴延鵬南與焉比至卽聞賊首黃有使陷永安尋又



陷沙縣副將李壽春令鵬南同千總宋世超外委陳文亨爲藩駐  
三門鵬南謂世超曰三門三面受敵且兵少不可守不如扼西芹  
西芹庄大糧足萬一失利退守七星橋尚可阻險作郡城障奈何  
以西芹之糧棄以飽賊也世超怵於軍令不聽四月二十八日賊  
入西芹是時三門兵不滿百又分三隊以文亨守溪岸爲藩守后  
山鵬南世超守中路賊不得進南平隸卒盧超導賊破后山爲藩  
奪小舟走而守中路者不知也忽所部兵大呼賊至鵬南持鎗向  
後擊之斃數賊鎗忽墜復奪雙手帶衝圍出賊從密菁中施矛刺  
之遂與世超文亨同時被難鵬南仲兄春蕃邵武教諭聞耗請假  
赴延平收其尸歸事聞 贈卹如例祀省昭忠祠吁鵬南壯歲負

長樂縣志

卷十六

列傳五

九

忠義

勇略方出其力爲 國家用何竟以一戰畢乃生也悲夫

參邵武  
虞瑞圖

忠節  
備采

王三韜字尚鑑一字旬臣旒峯白眉村人由武舉補督標千總咸豐  
三年龍巖土寇黃有使作亂三韜守延平以功遷中營守備六年  
紅巾賊麇聚順昌十三鄉四出虜掠總督王懿德檄三韜募長樂  
勇三百進勦戰功偉著賊勢窮蹙郡守金萬清倚之時督糧道王  
訓統兵駐邵武聞光澤警調三韜守鐵牛關未幾紅巾復猖獗秋  
七月三韜赴大幹敗賊於東鄉一日賊乘夜驟攻三韜兵乏知勢  
不能敵且天色迷濛不辨南北欲突圍出鄉民蟻附攀轅哭聲動  
地勉力拒守賊破柵入兵勇潰散過半退至吳家祠賊圍之三韜



謂兵勇曰爾輩儻去定遭賊手辱矣傾礦於地引火燃之烈燄障天皆灰燼踰垣出者僅三人越日萬清聞耗仰天號曰天絕我矣事將不可為亟赴東鄉收其遺骸哭之慟事聞得 贈卹如例祀忠義祠嗚呼三韜當事勢危急甘心投烈焰以死而不為賊辱亦可謂志士矣 參邵武虞瑞圖忠節備采 按大幹之役三韜所帶弁勇三百人同時殉難其得知名者里仁陳朝標龍門高妥二人而已附錄於此以表忠勇

柯元慶邑武生柯百戶人居會城授督標水師營圓山汛把總署本營千總咸豐癸丑四月土寇黃有使圍延平城慶奉召隨征首先入援與賊戰於城外十里庵力竭被害大兵繼至城圍遂解 詔賜卹如例祀省昭忠祠

長樂縣志 卷十六 列傳五 忠義 十

陳登標字滿友江田人寄居省城亮功鋪由延平右營馬兵拔補左營司外委署沙縣駐防馭兵有法捕盜惟嚴咸豐七年卸防務委署將樂縣汛會賊匪肆擾沙人士以標敢戰多謀稟留在沙防勦屢立戰功嗣聞匪嘯聚洋溪將圍城偕把總廖帶壯勇百餘名扎營西城外猝遇賊至眾寡不敵力竭陣亡 詔贈卹如例祀忠義祠

邱步衢字振翰一字仰周坑田人寄居省城美化鋪由行伍出身署撫標左營守備咸豐三年調赴延平勦匪猝遇賊至力戰身亡 詔賜卹如例祀忠義祠

王功字績甫號鴻山大宏里人道光癸卯武舉人歷任龍巖漳浦把



總咸豐七年克復歸化等縣陞千總旋署詔安守備十年汀州戒  
嚴奉憲征勦至武平遇寇身先士卒以寡不敵衆死焉事聞 詔  
賜卹如例祀忠義祠



節概

宋

林安上字民瞻號歸愚慎思八世孫遷與頭大觀四年釋褐歷官國子博士江東路監察御史吏部考功員外郎左史起居即秘閣修撰福建路兵馬鈐轄安撫使直龍圖閣亳州明道官廣東路經略使因劾丞相汪伯彥黃潛善誤國不聽遂致仕卒祀鄉賢舊志潘枋字廷堅以字行子儀孫後徙居閩縣端平二年進士第三人對策獨以濟邸事為言略曰陛下承休上帝飯德匹夫何異為人子孫身荷父母劬勞之賜乃指豪奴悍婢為恩私之地欲父母無怒不可得也又曰陛下手足之愛生榮死哀反不得視士庶人如此

長樂縣志

卷十六

列傳五

三

節概

一門之內骨肉之間未能親睦是以僮僕疾視鄰里生侮宜厚東海之恩裂淮南之土以致人和時對者數百人枋語最直會殿中侍御史蔣峴劾方大琮劉克莊王邁前倡異論併誣枋策語不順請皆論以漢法遂調枋鎮南軍節度推官衢州遷潭州通判日食應詔上封事曰熙甯初元日食詔郡縣掩骼鬻著為令故主一杯淺土其為暴骸亦大矣請以王禮葬丞相游似心善其言將收用之而枋卒枋所為文脫去筆墨蹊徑廷試策京師傳誦識者曰子韶龜齡輩人也著有詩集古樂府祀郡鄉賢祠舊志

明

陳文禹字佩昌嶺南人嘉靖六年以貢為龍游訓導廉正剛介雖閭



室言笑不苟與諸生以道義相勉取與一介必慎諸生貧者召至門下餼之見監司不途跪欲拂衣督學使者敦留之竟托微故申前志致仕去舊志

陳安字勉夫西隅人嘉靖乙卯舉人為衡陽令質直剛方不能阿媚衡山黃御史按浙還過其邑苞苴甚盛以屬吏禮凌視之安不能平發其篋黃白充物遂以狀聞即棄官去御史亦坐是落職舊志

謝汝烈字其作號冠石杰之姪勵志苦學食餼候官以明經薦授南平司訓擢廣東始興令冰檠自持守正不阿權璫爪牙欲採礦其邑汝烈杖而遣之旋棄官歸杜門謝客郡大夫延為鄉飲大賓董司空見龍常稱其人品最高云舊志

長樂縣志

卷十六

列傳五

十三

節概

陳奎輝字克韞別字漆林江田人天啓辛酉舉人授平和教諭行取令雲南姚州歷五載有政聲以親老乞歸福王立召赴南康同知大兵下九江孤城不守被執至軍府數以不從罪仍侃侃與爭旁有為之解者得放歸居匡山絕頂草舍蕭然取王陽明先生所傳良知錄力辨駁之間道歸江田故里以悲號卒初奎輝與黃石齋相國友石齋築榕壇講學其中特重奎輝為梓榕壇問業十三則又為序寤寐齋詩集略曰陳克韞思致清深才藻敏妙本家學而暢以惠風數百篇皆和美適逸可誦也今載石齋集參謝果節義錄

鄭允成字祖謙大父岳進士官至雲南布政司參政父彥大學生沈酣經史允成謹樸舉止迥異紈袴天啓丁卯年二十四舉於鄉數



困公車恬靜自守邑令鄭尚友夏允彝峻風裁少許可獨與允成  
交厚允成終二公任未嘗一言及私乙酉唐王立福州甲乙榜及  
有力者多人仕籍允成父捐資助餉例應授美職允成曰國家多  
難有能者効力有財者輸金皆臣子分所當然我朝三百年深仁  
厚澤一旦決裂至此凡有血性者當如何臥薪嘗膽枕戈待旦吾  
海濱男子讀聖賢書豈可掩吾父義舉博一官耶戊子後年逾四  
十灰心進取初喜內典久之棄不談專意理學由程朱周邵上溯  
孔孟穿衣百結俗咸以王湛目之允成坦不爲意所往來皆氣節  
及方外士浮沈人世鬱鬱不自得卒年七十四屬纊時強起呼諸  
子曰吾死有遺恨銘旌書前孝廉三字足矣言卒而瞑

參謝杲  
節義錄

長樂縣志

卷十六

列傳五

十四

節概

陳鳴石字體魁號若雷德隆五世孫鑾曾孫也累葉仕宦族眾繁盛  
鳴石獨甘恬淡嚴操守登崇禎癸酉鄉榜次年會試落副車還里  
益奮力下帷甲申鼎革後恒言我朝事事度越前代明王六七作  
不幸天降喪亂而北方連年荒旱逆闖輩緣以竊發竟致海宇崩  
裂吾真不知其解丁亥授禮科給事中正色立朝不附權貴戊子  
後杜門掃軌卽里閭中非素心者招鮮赴教子依禮法盤桓林邱  
三十餘年庚申秋七月卒壽八十四初丙戌秋貪仕進者多隨征  
前明孝廉亦逐隊北上鳴石笑曰吾雖生值叔世豈真富貴重於  
綱常耶舉人思捷南宮者固不足掛齒牙閒卽宦裔不諳大義冀  
他圖進身不特天地痛絕恐祖先冥冥中亦不無怨恫也後官粵



東者十不一二存皆如所言著有竹溪前集抱冰集共四卷

參謝  
景節

義  
錄

林大乾字用始尚書廷選曾孫也為郡諸生讀書能文旁及騎射偉狀貌美鬚髯結立文社所與遊者李元仲林守一張道羽輩咸一時名流崇禎壬午落副車改雋武場同儕赴賀大乾掀髯嘆曰吾文士也世受皇恩圖報念切造物吝我一第特借此為進身階非得已何賀為乙酉以薦授都察院經歷會太常少卿嚴通視師浙江戒行有期而難其副廷議非林用始不可大乾慨然束裝就道參贊機宜卒不辱命歸居竹田祖里丁亥署羅源縣事潔已字民雖軍興旁午正供外一毫不擾聽政之暇浮白談文旋擢兵部職

長樂縣志

卷十六

列傳五

五

節概

方司主事迨監國揚帆痛哭而歸棲遲泉石不聞時事後數年卒

參謝景  
節義錄

陳達字克亨家望族大父訏謨萬曆辛丑進士官布政司參政父作肅邑諸生遠近稱為長者達倜儻有才早歲入泮即受知於董恭介崇禎丁丑陳聖泰程坤二人負時名不謹口舌為人所中新任督學執法禍叵測平日與聖泰坤稱密交者概裹足達竭力周旋不避艱險尋陳程事白達以此名聞當時乙酉領恩貢廷試授鴻臚寺鳴贊遷御贊蓋特設以示寵異前此所未有也旋陞錦衣衛經歷丙戌秋削髮為僧別字八水取鄭所南思肖意終日探陟名勝翩翩物外丁亥起兵部職方司郎中擢鴻臚卿當監國駐江滸



百凡草昧達侃侃持正議不亢不阿魯王出走退居窮島備嘗艱苦或勸歸故里薄田尚堪資給何爲空貞苦節達嘆曰今我雖饑殮不足冠服猶昔日也況肢體髮膚受之父母若改絃易轍作温飽計不特無面目見人亦何以慰祖先於冥冥中哉竟卒島上

參謝

果節義錄

曾人翰字明克明季諸生天性剛毅不事浮華授徒講業成就甚眾丙戌秋次應歲貢人翰鄉居抗志督學行牒促赴考亟人翰語催役曰汝亦知有不畏死男子曾人翰乎欲殺欲割唯命此髮終不可動當事置不問未幾病篤屬纊起坐取冠服審視著之含笑而卒

參謝果節義錄

### 長樂縣志

### 卷十六

列傳五

六

節概

陳希友字朝文號孝兼江田人先代則安時憲錠洙四世科第至洙官太常卿家省城希友其曾孫也博學能文以諸生負重名丙戌歸祖里丁亥秋魯藩監國以薦授兵科給事中數建言不爲權貴懾戊子後祝髮爲僧薪米悉資胞弟希參性豪爽好飲吟哦窮晝夜不就寢嘗刺血寫孝經一百餘卷以貧故未葬親藉以報也後爲楚世子成治株連逮至廣東人勸易僧服晦宦蹟希友曰吾世沐國恩豈容顛沛毀素履且令張陸笑人哉尋斃於獄著有蓼巖集及詩文多散失弟希參以孝友稱

參舊志及謝果節義錄

劉桓字愈學號志來十六都華厦人明季以貢選授連江教諭與福安進士劉中藻相期赴難後中藻死桓被執繫獄備受重刑終不



改節 國朝念桓忠義赦為逸民

舊志

國朝

吳士宏字嗜士日來子康熙壬子舉人耿逆變士宏與父抗節佯狂  
堅辭逆職偕蔣桓陳學夔棄家遯迹桔園洲凡三年邏騎逐至誓  
死不屈逆平授連城教諭改永安權知彭澤縣減賦役嚴苞苴絕  
餽遺為撫臣所齟齬兩江總督阿山劾撫臣不公稱士宏素履端  
方居官廉慎尋解組歸卒年七十著有對山詩文集祀郡忠義祠

舊志

陳慶年字聲揚一字肖丞文翁子少隨宦京師刻苦自勵年十三父  
卒於官獨力扶櫬及眷屬歸既冠以邑廩生中咸豐壬子舉人會

長樂縣志

卷十六

列傳五

七

節概

試挑取教習侍郎黃贊湯薦教授鄭王端華府中端華厚待之慶  
年居半月即辭館大拂端華意資脯不備狼狽至杭劉觀察齊昂  
留課子弟未兩月髮賊陷杭城被執械至江甯授以偽官不受令  
掌書記以不識字辭復械歸杭城為燬下夫備嘗苦楚不挫其志  
嗣雜賈人中逃走敝衣破屣行至上海附火輪船歸卒於家



孝弟

唐

林巨卿縣東梅花坊人有孝行葬父周廬墓三年甘露降於地人謂  
孝感所致後應文行科出仕舊志

宋

鄒異字士奇邑西侍中坊人有孝行親歿葬南山廬墓六年有甘露  
芝草之瑞元祐三年舉經明行修有司因改其里曰賓賢坊曰文

行舊志

高宗信後澳人甫四歲能知孝讓及長凡所以事親者惟恐不至元

豐四年里人直講陳烈以聞舉孝廉官金紫榮祿大夫舊志

長樂縣志

卷十六

列傳五

六

孝弟

明

范御古槐人父瓊洪武十四年由明經薦任黃巖丞以徵糧稽違論  
死御年十九上書擊登聞鼓乞以身代太祖嘉嘆詔釋瓊等御竟

以擅擊登聞鼓斃杖下時鄔孟妻王氏亦乞贖夫罪自經死京師

為之語曰范瓊子鄔孟妻貞與孝孰能齊

舊志○鄔孟妻  
事詳貞烈傳

柯文基石梁人甫五歲失怙恃依祖母陳氏比長侍奉溫清備極敬  
養祖母九十六卒居喪三年衰絰未嘗去體喪葬如禮鄉黨稱孝

舊志

黃熙字汝明一字皆山銅孫天順甲申進士南京吏部郎中仁孝天  
昇初領鄉薦以父老不上春官父歿哀毀骨立竭力營葬登進士



後復以母老乞歸養母歿終喪始官於朝以廉謹見稱後獲贈父母卽乞病歸卒之日命其子薄殮曰吾昔家貧治父母喪未盡禮吾雖居官治喪不可過吾親也祀鄉賢舊志

陳晉昌字鴻翰以字行嶺南人事父母至孝父伯通年九十餘時晉昌已老身為滌廁伯通病殆晉昌祈天減算以益父年父疾旋愈延二期而歿既葬朔望必攜果茗詣塚上拜且泣雖風雨不廢又於塚次遍植菊以父性愛菊云舊志

陳德宗字克修一字復齋沙京人甫九齡有至性侍母王氏疾身為枕藉晨夕不離逮事繼母鄭氏無異所生卽廁膾躬為浣滌兄弟四人同爨五十餘年友人林碩夫旅死靈山寺德宗時寓歸化聞

長樂縣志

卷十六

列傳五

十九

孝友

卽貸金往殯為挈櫬歸嘉靖乙酉貢任始興訓導歸休恬澹自樂兄弟之子生聚日繁為擴堂宇居之舊志

黃讓嘉靖時父墓為山賊所發質其骨責贖讓罄產而葬之乃募壯士百餘人從督府討賊二子啓愚啓魯死之讓出奇計斬首二百人降者一千七百有奇賊既滅推功於諸校不受賞而去舊志

鄭伯遠九都人以孝弟訓子孫六世同居邑令夏允彝為詩旌之曰粵惟鄭氏條分枝散樹德已深六葉同爨動非為身悉捐崖岸匪惟涵覆又啓迪之豈無細故讒口罔施豈無粟帛敢曰自私瀆懷天造猜疑不貲踵武相銜進止有序文嗣遺風太和懿緒曜族勝宗焱騰波湧樂在家庭名非榮寵衣絕盛飾居無雕拱千霜植年



萬畝結陰瑞藹如雲南風如薰抱爾子孫振振洗洗舊志

王恩鴻字子玉兄恩及合粵東恩鴻在家奉母李氏以孝聞崇禎十

七年母病篤割股以療知縣虞祐旌其門曰孝友相師舊志

國朝

陳貽謀字克臧江田人明季海寇擄人索贖貽謀父德容被執乞以身代至三閱月凡未贖者十七人賊將盡殺之夜賊長夢神曰陳

克臧孝子也無相害厥明釋之卒後復遭海寇焚劫鄉無餘燼惟

貽謀柩無恙人謂孝感所致墓在五都馬臺北塢山舊志

陳驥字昌奮一字叔舉邑諸生古縣人父兆甲字克鼎前明國子監博士老矣以某甲事株及並左伯周亮工下廷尉驥橐餽三載備

長樂縣志

卷十六

列傳五

三

孝節

極艱辛時西曹新製三木刑多死一日兆甲次當夾訊驥闕入法堂請以身代情辭懇至法司皆墜淚後朝審旋風吹牘入雲中亮工與兆甲冤俱白驥御父歸與孫學稼鄭宗圭高兆許瑛許友及仲兄驥諸名宿修平遠臺詩社追蹤曹徐驥所著有中軒薊游二集驥字仲桓老於諸生有偶菴集二十卷

江子璜字朝雄雲路人值海寇內遷葬母未能如禮言及輒流涕後乃與父合葬躬負土成墳廬於側里有患難多方拯卹及貧不能

婚葬者悉周之卒祀於鄉舊志

王萬年字眉友西隅人性孝友志行端方康熙丁巳以貢授上杭訓導事繼母陳氏備極孝養母病二年不解帶嘗以產讓弟鄉閭有



爭財者聞萬年言愧而止卒祀於鄉舊志

鄭敬賡字復言西隅人性孝友母病割股以進疾遂瘳雍正十年藩

司張 以孝友可風旌之舊志

鄭良智字祖睿西隅祥厚人與弟良琬字祖英相友愛竭力事親知

縣梁 旌之曰昆友承歡舊志

楊元挺字永哲一字于岳邑諸生犀村人性篤孝母病偏枯親奉湯

藥五載不離床側朔望稽顙求以身代中丞張伯行聞其賢徵入

書院參訂張志棟延為普文書院山長成就甚眾著有學庸正宗

古文評本及詩文集舊志

吳九如字質侯邑諸生士宏長子有夙慧博學能文天性孝友長於

長樂縣志 卷十六 列傳五 孝弟 三

經濟從父宦遊十餘年隨時佐理大著循聲祖柩未葬弟妹已長

父以兩袖清風家計日絀九如鬻妻奩具以成其事居常分甘讓

肥不私尺布士林重之舊志

歐陽文字詩同邑諸生十六都人孝友篤學父母終家貧不能葬負

土成墳事兄猶父歲所得館脯悉以分兄囊無餘積授生徒以簡

言闡發理要多所成就著有四書集說五卷舊志

石鐸十二都人乾隆七年七月間暴雨滂沱父漂於水奔救不及鐸

抱小樹父又隨水沒鐸舍樹赴救均溺死鄉人哀之舊志

林天孟沙京人幼失怙甫十歲母病篤割股和藥以進母隨愈生平

仗義修橋道息爭訟知縣以孝義可風旌之舊志



張金鼎字孟彝西隅人素有孝行父死日有羣鴉環繞其居事聞督撫以孝行可嘉旌其閭舊志

陳天佷青橋人性孝友九歲母病奉湯藥必親嘗母卒一慟而暈每忌辰歲臘淚輒沾襟父年八旬常扶出入呼爲人杖年二十六苦讀卒族黨惜之舊志

陳時夏字道定一字常于古縣人乾隆乙卯舉人少失怙節母高督之學必閑以禮法十歲從叔父讀書卽知發憤勵學不苟隨流俗步趨同學皆以爲迂平日痛未事父遇忌辰必素服哀奠奉母悉得歡心事叔父如父終身不衰甫冠入邑庠讀書齋峯書院主講鄉賢孟超然卽所業深器重之時進講堂勗之曰知志古毋泥古

長樂縣志

卷十六

列傳五

三

孝第

知正學要力學時夏自是益屏絕紛華體認實理事事必精察而力行未壯秋捷以母老不與計偕授徒里中推誠相與從學者必先示以濂洛關閩之正敦倫紀辨義利端趨向隨材造就不苛以所難從遊之自遠方來者至視席無所容易簣前一夕猶強起評文藝題其末曰讀書不勤則學荒學術不端則心壞此際須大有把握年四十有六卒學者稱爲常齋先生錄所遺書有學庸釋註二卷周禮要解二卷榕軒詩存一卷通志

陳泰瑚字恆揚一字鼎石岱邊人太學生少孤事母孝朝夕必親問視病侍湯藥不離出與兄謀生計少有獲必歸告母及母歿哀毀骨立未幾兄又歿無子以長子爲之嗣待寡嫂敬不衰數十年如



一日學使彭蘊章旌之曰孝友可風性鯁直好施與賑恤貧窮遇  
荒年施棺減糶里人德之卒年七十七子八人長鴻材字淑寬一  
字岱軒邑諸生繼伯兄嗣性純樸嗜學不倦與弟鴻音鴻泉等相  
師友敦禮讓年六十始析居諸弟以產當兩股均分請鴻材曰吾  
以序長承繼大宗此不得已之事若因此坐獲厚貲非吾心也及  
分產少自與家延師五十餘載待先生忠且敬今其後嗣科目蟬  
聯人以爲敦睦之報云

陳觀瀾東隅人父良琨邑增生以苦學致病察觀瀾寢食不自安日  
籲禱於神乞以身代割股和粥以進父歿哀毀骨立有孤姪肇經  
貧不能讀瀾罄所積爲備脯資俾卒業成諸生壯爲授室其敦睦

長樂縣志

卷十六

列傳五

三

孝弟

蓋出於天性云

方英穎字隆文幼隨父諸應幕遊肥城逾年令去官諸應飄泊無依  
以病沒客邸英穎年十五搥胸號泣痛不欲生勉營喪紀鬻衣衾  
負遺骨歸冒風雨忍饑寒道出蘇州沾疾月餘資盡爲館主婦驅  
出舍英穎抱骸哭道旁達旦值長官過稔其故厚贖之並給牒護  
歸里奔走數千里歷十閱月備嘗艱苦後四十年學使吳孝銘採  
輿論旌其閭曰髫年至性邑人王登三爲之傳

鄭敷亨字元齡雲路人父行彪秉性嚴毅明取與愼言笑族黨重之  
有以小忿啓釁者得一言輒解釋尤精算學著有算經匯源敷亨  
幼孤隨母育於省城舅氏因家焉遊明經陳本欽之門本欽深器



之妻以孫女兩應童試不售以家貧親老棄儒習幕入都充院供事秩滿候選府經歷聞母病馳歸侍奉湯藥衣不解帶者累月夢神賜以藥疾頓減自是杜門養母先意承志能得歡心與伯兄敷昭相友愛置田三十畝盡以歸兄不分儋石素儉約而好施與戚里有意每傾篋周之閒或質錢以應於貧士尤睠睠焉有張姓者久賃亨屋廉知其苦讀免其租值又量爲伙助學以有成生平絕嗜好唯喜書籍遇善本必購曰以此貽吾子孫今其後嗣科甲蟬聯皆能讀祖父遺書論者以爲積善之報

黃汝楫字景麓一字樸園青山下人邑諸生質魯好學遭遇艱屯晝負薪而夕讀書食力奉親連丁內外艱哀毀備至以傷感病明眇

長樂縣志

卷十六

列傳五

三

孝弟

一目弱冠卽授徒四方積束金爲諸兄婚娶撫諸姪如己子一門之內怡怡如也生平尚節操重氣誼不輕取與不妄交遊誘教生徒先品行後文藝遊其門者無論資稟高下皆能成就其貧而無力者咸助以膏伙不取束金一時知名士如黃榮庚黃翼爲皆出其門晚始娶室旋病瘵卒伯道無兒哀哉以門人黃翼爲 貲贈中憲大夫

林仰先字道平古縣人父業農家貧喜讀書道平體父志勤苦力學旦晚必侍側親奉菽水有長兄客連江久不歸父思之時流涕仰先數往泣跪而挽之歸爲娶室以安其身父樂之曰吾非道平幾無長子矣鄉黨稱其能承父志咸豐元年入祀忠義孝弟祠



鄭思權字素守古槐人父汝誠名諸生敦品植行鄉里稱爲長者權幼知孝讓年十一喪母哀毀如成人事繼母尤謹父病祈天減算及居喪哭泣盡哀遇忌日輒悲戚伯兄善病飲食藥餌親奉十餘年不稍懈撫愛羣弟董勸並用俾各成業歲得館穀悉以分兄弟生平有志正學嘗詣建陽慕朱子之鄉欲移家就居以母老兄病不果乃考訂道學源流採其嘉言懿行講求弗倦其卒也士林惜之同治四年邑人陳中翰萇芬爲請於 朝旌焉

高齊雲職監生遷居省垣南關外醴泉鋪早失怙椎心泣血每以未獲逮養爲憾家故貧自飲糜粥而供母甘旨必備母多病每夜焚香禱祝及母歿哀感異常嘔血數升以瘠瘵死邑人爲之請 旌

長樂縣志

卷十六

列傳五

三五

孝弟

焉

陳鳴霄名解勉西隅人幼失恃哀毀備至父方振性忠厚而教子極嚴稍不如禮鞭撻不少貸霄先意承志獨得歡心父病夜必需人霄衣不解帶者數月歿後喪葬如禮素經商有餘必歸兄不敢自私年四十以積勞卒鄉閭惜之邑侯秦煦給以匾曰敦孝篤義並爲請 旌同治六年建坊入祠

張柏字可同一字從寮東隅人幼失怙事寡母鄭氏老病十有一年以孝聞及卒禔葬父塋日必一往數十年如一日有三兄相繼卒視諸姪如己子共爨六十餘口內外無閒言待族鄰和而有禮老穉咸敬之嘗途拾遺金伺還其人其廉謹如此學政邵表其門曰



孝友可風同治八年請 旌

吳三英字存禮一字芝田西隅人國學生善畫蘭天性純篤七歲喪母哀毀如成人長事父以孝聞妻王氏亦割股療翁疾後其父失明英以舌舐淚以口哺飯者五年族黨稱之同治八年請 旌

柯良貞岱西人天性純篤幼失恃十一歲而孤哀毀若成人善事繼母先意承志問視惟謹母病衣不解帶者彌月待季弟友愛備至長任家政凡事必稟命而行飭躬勵行恆以辱親為懼勤學能文蹇於遇艾年猶刻苦異常語人曰非敢躁進恐負篝燈母訓耳年五十三卒同治八年請 旌

陳尚洙東隅人性孝友幼知禮讓不與諸兒戲人詰之答曰恐致口

長樂縣志

卷十六

列傳五

三

孝第

角辱及父兄耳年十六父病篤祈天減算乞延父命父卒哀毀逾常事寡母尤謹與兩兄聚處一室怡怡如也因顏所居曰怡怡室年二十六以苦讀櫻瘵疾卒同治八年請 旌

割股者五人

林紹天

字思明省居母趙氏病篤割股和藥疾尋愈

林宗疇

字心田紹天子有父風母病篤割股以進

李國儀

字咸統仙山人父病革割股和藥待寡嫂張氏五十年敬不稍衰

林振燕

東林人與弟振鮑振厚相友愛道光十六年母病篤割股以療病尋愈復妣壽二十五年

王貞鰲

寄居后與母病篤割股以進疾尋愈

給扁者六人

楊干科

字建斗三溪人學使彭蘊章以政善庭闈旌

董守仁

字述本古縣人學使吳保泰以倫篤行修旌



李道濱 岱邊人學使彭蘊章以敦篤可風旌

友可風旌

嚴成事之唯謹年六十猶愛慕如嬰孩事庶母以禮撫幼弟孤姪以恩學使邵旌其門曰敦篤可風

李登衢 字家振邑廩生漳港人性孝友事邁父傳時扶持抑搔敬形於色惜天不永年二十五卒同治八年請旌

鄭乃俊 字昭彥一字偉齋邑庠生西隅人知縣彭光藻以孝

陳成 字崇有一字雨亭珠湖人貢生性孝友父良潤治家

長樂縣志

卷十六

列傳五

三

孝弟



鄉行

陳

嚴光十三都人大建初捨宅為光嚴寺捨田為湖即今之西湖也溉

田四百餘頃

按劉則和舊志云嚴光居紫微峯下晉建元時人家富好義常貸錢於人不責償只令立券結來生緣遠

近咸稱長者時有漳人乘驢詣其家貸錢數千緡以驢載去至鶴嶺驢忽不行策之作人言曰子勿策我我前生向子貸錢今為驢以償債期已滿不可策矣漳人悟載錢詣光還之光子恭商販揚州次江許遇漁人鬻黿市五十枚放之光在家忽見有披黑衣者五十人送緡錢五萬曰君子恭揚州所附也恭回詢之云未嘗有所附惟於揚州放黿五十枚黑衣送錢毋乃是耶於是捨宅為寺捨田為湖一日有鄉人客歸黎明路經鶴嶺遇光乘輿扈從甚都家人從後發如赴任行裝及至里中始知其飛昇也錄之備考

唐

林鷗字祥鳳方樂里人開成中進士為倉曹參軍大曆中因南郊沙

長樂縣志

卷十六

列傳五

三

鄉行

合捐田築濱澗二湖溉民田七百餘頃妻趙氏亦捨奩田為湖人

呼林婆湖四里民德之祀於皇恩寺又立廟湖旁

舊志

五代

房長者名洗十都人捨田為桃枝湖捨宅為大澤寺鄉民祀之

舊志

宋

鄭綱字舉之沙京人本里湖塘路一帶苦泥瀟綱捐貲鋪之并造石

橋

舊志

黃昭字惟明一字恪溪青山下人生宋嘉祐年間處已清簡而好施

與所鋪石道不下三十餘里如本鄉及羅雀界牌坊兜陳坑嶺陽

夏等處石刻俱在至今利之



元

陳有霖字希說藍田人性恬退輕財仗義至正中築鄉約堂於藍田  
書院之旁中祀先聖以朱呂二先生配朔望舉行藍田鄉約擇鄉  
之長老為約正使鄰里子弟講學其中時人名之曰義學嘗與歐  
陽侁往來論道尚書貢師泰為作義士記舊志

明

高壘字德滋一字東峯伯齡子端靜敦敏樂善不倦父俸資悉讓於  
其弟族兄弟有鬻子者為之贖歸孱弱者黽勉護掖之俾植其生  
宏治辛酉領鄉薦任安仁令懷節勵行未嘗妄取一介留心民瘼  
晝夜不少休及卒篋中惟敝衣數襲士民哀慕之祀於鄉舊志

長樂縣志

卷十六

列傳五

五

鄉行

李長孫字元善沙京人讀書好義樂施不倦鄉有貧不能葬者出費  
營之凡數十人里有田數十餘頃低者患潦高者屢旱長孫捨田  
濬溝二百餘丈名福田溝又濬舊圳名興利圳後以子騏貴封修  
撰壽九十二舊志

董巖字建南諸生二十四都鼇峯人好義周乏置義田以贍宗族邑  
令孫濂著彰德篇以嘉之舊志

陳耀字孟輝一字竹泉晚更字睡庵古槐人年五十僑寓省南臺后  
洲初讀書得朱子小學深體味而訓釋之由是以之持身教人行  
動不稍踰矩矱尤喜讀朱子名臣言行錄不干仕進性孝友學粹  
行純閭里化之壽九十終嘉靖丁酉巡按李元陽提學江以達田



汝成入奏祀鄉賢

姜穎楓林人輕財好義嘗出田二十七畝為族屬諸生膏火資舊志

陳振龍寄居會城南關外達道鋪萬厯初沿海經商至呂宋見高崗

廣野匝地青藤詢之士人云此薯也生熟皆可食試之甘而脆思

中國得此或可代糗糧但夷禁嚴種斬弗與龍喚以利句其藤數

尺歸種之紗帽池旁子邑庠生經綸以父所得種陳六益八利及

種法獻之巡撫金學會檄所屬郡如法栽種歲大獲民賴之名曰

金薯 國朝康熙間四代孫以桂帶浙江鄞縣種焉大有成效其

子世元籍閩縣貢生復與余瑞元挈種至山東膠州膠地早寒種

不易活元每歲補運教以藏種法隨遣長子雲次子燮運至河南

長樂縣志

卷十六

列傳五

三

鄉行

朱仙鎮及河北等縣三子樹由膠州運入京師齊化門外通州一

帶所種之處利倍於穀迄今食其利者數百年世元著有金薯傳

習錄捕蝗傳習錄行世

論曰龍之功宜隆食報其子若孫克承世業廣濟民生亦豈易得聖人於蔬食菜羹

瓜祭重本始也世人於薯之入中國多不知始自何人故功鬱不彰如知龍也黃衣黃冠報賽款祀彌阡匝陌將接踵不絕矣

國朝

陳奮鵬大宏里人性剛方負經濟才時有奸匪歐子禧等導海寇橫

劫諸鄉奮鵬集眾殺之又寇掠婦女據奮鵬館為巢奮鵬伺其他

往盡釋之焚其館寇信為災不之責後徙家厚福有甘藍赫三鎮

聚嘯馬山官司將文石廬舍盡燬奮鵬獨以徙免眾服其先見云

舊志



玉德勛字我山邑諸生梅花人性聰敏學問淵博夙負大志時飛沙與梅花城平德勛率所軍民挑之役者有碎我山肝腦之怨不逾時海寇攻城月餘不下合城悅懌又有恩在怨銷磨之頌著有梅花詩賦載藝文舊志

林維揮字崑奇前林人慷慨仗義順治初海寇擄梅花文石男女共二十一口維揮悉出贖之知縣韓武及衛建勳兩舉賓筵五代同堂卒年八十六舊志

陳繼嗣字亨達一字玉瓚邑諸生輕財好義歲延師家塾生徒來學輒資膏火假親鄰以屋並周其匱乏之死則爲之殯葬見遺糧者屢受筆楚卽未謀面亦代輸納以子天立贈文林郎舊志

長樂縣志 卷十六

列傳五

三

鄉行

陳守泰字而一西隅人一門孝友樂善好施壽百歲五代同堂康熙戊申舉鄉飲介賓方伯楊廷耀旌曰五世德星知縣陳諧顏曰百歲翁弟知希順治初辟授廣東曲江令子善聘年亦八十六並舉

賓筵舊志

陳仕雅字道月郡庠生十四都人性孝友凡祖祠墳墓時加修葺與弟道履白首同爨族鄰有爭訟多所勸息一日向佃戶取租佃者厲目張拳反行肆詈仕雅不校而歸有頃佃老俸水墜車下死有嗾之嚇詐者其家人曰吾通租反辱業主奈何復以屍嚇之其大量服人類此年八十縣舉賓筵舊志

陳長祚字亨穀十六都人孝友敦睦有族兄貧甚往浙貿易因家焉



嗣夫婦俱卒子幼長祚為挈櫬歸撫其子如己子長為婚娶且給之產又有舅母早寡中表幼長祚迎養於家教訓成立眾皆義之陳長煥字子章性篤實從不作欺人語與柯順耳異姓同居歷三世男女各數十口無閒言後子琦成進士為循吏皆其庭訓云舊志

陳洪漢字仲春太學生五都人素為洋賈鄉人受惠者以數百計獨出千金造湖州甯波兩郡浮橋建本邑廳事捐金四百又捐社穀四百二十石巡撫張伯行以尚義可嘉旌之別立五都附一圖戶

永免徭役碑豎縣堂側舊志

林廷謨字明經二十一都人居西隅醇謹好學補諸生應鄉闈二十餘試邑有公事輒傾囊倡成舊志

長樂縣志

卷十六

列傳五

三

鄉行

林嗣榮字斯獻瓊瓚之父性豪曠所見者大不屑屑為自己謀嘗謂族人曰吾族以海為田不如以土為田捐斥地四百餘畝與姪孫申甫董砌三塘計成田三千餘畝初稅鮮蝗率以給單稽遲貨多棄地嗣榮訴於官並豁海鮮諸稅至今賴焉舊志

王用亨字存嘉二十四都人謙謹有德量里有偷兒入其室故作聲歎聲使聞而去終不發其姓名族人某者年四十家貧不能娶用亨為之完娶宗祧有賴焉舊志

董逢帥字爾謀二十四都人勤儉孝友輕財尚義雅重讀書課子紹安舉孝廉遇公事輒慷慨出力鄉有田數百畝水道淤塞率先倡捐開濬旱潦藉以不虞梓里咸嘉賴焉舊志



林毓鶯字有煥感恩人敦族睦鄰康熙初南陂壞出貲倡修知縣衛  
良佐以樂善好施旌之舊志

李詠字永言邑廩生東隅人孝友端方撫孤姪如子為文獨出所見  
試輒冠軍衛胡蔣三邑令歷延為義學山長多所成就表其閭曰  
士林模楷邑有公事無不毅然力任著有五經纂要舊志

嚴來字常有一字二酉父尙英前明名諸生鼎革後絕意仕進來少  
承庭訓博洽工文補邑弟子員敦孝友重然諾邑令深器重之有  
大事輒諮訪而後行凡曲直互持將赴官訟理者經來排解莫不  
心服有某氏兄弟爭產引大義論之咸感悔人目為漢王烈治家  
嚴課子義方困於場屋未竟其用上論惜焉以子夢兩贈文林郎

長樂縣志

卷十六

列傳五

三

鄉行

舊志

鄭嘉謨字祖若一字芝田東隅人孝友樸誠好施與戚族待舉火者  
甚眾閒有逋欠力弗能償者嘉謨輒焚其券某與某賬目不清訟  
於官嘉謨陰代為償以平其事舊志

林長信字撫行十八都人孝友孚於里閭時值屢遷族人多流散信  
為之葺室廬鳩子姓恤困濟乏毫無所吝舊志

林慶庭字章祿金峯人少孤祖父母年邁八旬孝養彌篤生平以古  
道自持待人無忤色知縣殷鳳梧旌曰品行端方舊志

柯順耳字治齋與頭人邑廩生元標子性醇謹好行善事里有貧乏  
輒周之邑中高某者家徒四壁遺七棺順耳為之營葬修西坑菴



骸于計康熙戊子有總鎮夫人某氏發願修尼菴一日遣啞尼修菴費密裝米袋中尼至中途日暮無賴輩欲攘之適遇順耳斥之而止引尼到其家開視米袋計將值五百金次早送尼歸菴點交袋中物並不告以姓名而去素與陳長煥友善三世同居人稱為異姓同胞子瓊以舉人任湖廣雲夢襄陽等縣皆有聲舊志

謝清荅字謹修一字云美太學生議敘州同居會城端方質直事親始終盡禮友于弟兄讓財推產無少吝有叔無嗣清荅事之猶父里有貧者多資給之遇橫逆輒以禮化獨修郡學 文廟創嵩山書院濬本邑文洽浦皆以身先乾隆二十三年以急公輸餉 恩

賜品物

舊志

長樂縣志

卷十六

列傳五

三

鄉行

陳文德字懋來一字修齋國學生潭頭人寓會城幼孤有遠志祖遺田宅悉推與伯叔而家漸起自奉儉樸施與不吝歲延師里中子弟可造者輒助膏火凡廟宇橋道多鼎力捐修邑文洽浦久湮倡捐砌濬中丞周學健旌曰義充鄉國舊志

林佳晃字允照厚福人捐授州同輕財好施修本里橋道又造連江蓬崎道今呼為允照道康熙六十一年以遵例急公授儒林郎舊志

林朗亭字靜昭二十三都人孝友端方五世共爨一門皆修儒業朗亭獨持家務好施恤患和族睦鄰至今子孫猶服其教舊志

高岱字守東于岡子治家嚴肅以耕讀課子鄉有難處事輒為排解築隄岸障溪水潤田又捨租西石巖寺殊有長者風舊志



卓至尚字義哲仙山人性篤厚尤敦宗族倡建祖祠獨任勞怨早年失偶生男世潤甫四月隱抱蘆花之懼誓不再娶又爲外祖父母營造墳墓人稱其義課子孫家法整肅康熙閒薦舉賓筵舊志王應元字茂任感恩人舉明經慷慨好施周貧濟乏遇有喪家貧不能具殯輒贈之惠周鄰里子德健庠生著有巽齋集草孫韶鈞領鄉薦人以爲陰德之報

鄭耕字祖士西隅人國學生性孝友多材略邑有公事每毅然引爲己任雍正二年奉 文廣弟子員額郡屬閩侯長福爲四大學耕偕周元林琮姜文春陳運等請於知縣楊儒臣上達大府各增五名士林德之鄉先達吳化等以有裨宮牆投牒邑令請旌春秋丁

長樂縣志

卷十六

列傳五

三五

鄉行

戊二祭致膳以志不忘舊志

鄭其鳳字祉岡十七都人素倜儻遇事敢爲雍正閒奉 文將丁銀併入苗米帶徵總書乘機濫派計銀二百八十兩有奇鳳力訴大

府乃豁免舊志

鄭兆奎字學悅陽夏人邑諸生天性醇厚以孝友聞母病三年親侍湯藥不離左右待人無忤色親朋共飲其和居家課督子孫多克

成立卒年八十五舊志

陳佶甫字孝允鳴瑜子事父母以孝聞時海氛初靖同堂弟姪多流徙四方佶甫爲之蓋屋使復其所有兄孝達早亡嫂孀居無措甫撥田給之並爲擇嗣康熙丙子歲荒資舉火者甚眾舊志



范文昇字孝康國學生古槐人性孝友好施予鄉里重之

舊志

林申甫字久徵考授經歷敦孝友築壺井塘知縣陳諧旌曰功垂梓

里

舊志

陳正松字長觀一字雙橋居珠湖康熙時人早失怙恃獨持家計時海氛正熾疊次避寇撫六弟二妹保護備至以友愛稱晚尤力行善事創建支祠修造橋廟恒慨然已任爲閭里倡常以孝弟力田早完國課訓飭子孫卒時孫曾數十人壽七十八人以爲積德之報

陳宏孝居阜山康熙時人性孝友待族鄰謙和無忤色尤慷慨好施鄉居傍海一帶田地苦鹵瘠艱於插禾宏孝捨田鑿新港南至龍

長樂縣志

卷十六

列傳五

三

鄉行

塘角北至龜坡潭計一百七十餘丈以蓄淡水復開聯橫坡北至貓頭以通於海計八十餘丈合鄉水利賴焉時值海氛初靖戶口零丁生產匱乏宏孝捐田四十畝爲祖祠祭祀費族人德之歲祭祖特耐祀以報焉

陳鍾字秀訓一字芝庭旒峯人性恬淡好讀書學養深醇對人無疾言遽色嘗肄業鰲峯與鄉賢孟超然交最篤晨夕觀摩不問外事主講鄉賢林枝春深器重之乾隆己卯超然領解首鍾登其榜尺牘往來必以道義相勸勉居鄉和而不流敦孝弟守忠信一二頑梗不法者必多方開導使之感悟掌教甯德書院十餘年多所造就士林德之晚授永春州學正



陳汝楫字廷交一字若川古槐人乾隆戊子副貢性端方治家嚴肅與父兄言終日侍側目不流視後輩見之肅然起敬無敢以非禮犯者喜讀書聚書六千卷硃墨殆遍尤工書法人共珍之鄭進士肅於同學中獨刮目相待著有學庸邇言二卷

劉用賓字觀謙郡庠生漳港人生平不苟言笑以禮法自持鄉鄰望而敬之尤篤氣誼視生徒如子姪視朋友如弟兄人咸稱其誠信弟豐字德謙邑廩生手足友愛以道義相切磋鄉有久所神作崇一方巫覡挾之爲利牲牢酒醴演戲賽願者幾無虛日用賓曰此五通之流也光天化日奈何容此邪魅橫行毀其廟摔其像而此風頓息者數十年論者謂用賓嚴毅而不絕物豐和易而不徇人

長樂縣志

卷十六

列傳五

三

鄉行

性情雖不同操守統歸於正蓋一時稱競爽云

謝世南字沿江一字慈田廩貢生肄業鼇峯主講朱仕琇器重之性好施每遇貧窮解衣推食賙給無所吝至修文廟新學宮尤傾囊以助著有蒙齋講義二十四卷東嵐謝氏詩存二卷長子贊附貢生治家修身一遵先訓所存質券多至百數十紙晚年悉命焚之曰此皆無力還者毋留爲子孫滋口舌也著有蕉窗筆記四卷

陳錫璋字爾奏一字二如歲貢生厚福人弱冠補弟子員歷試優等設教省垣先器識後文藝遊其門者均能砥行礪名晚年家居弭爭訟和鄉鄰掩遺骸戒溺女里間化之書法學二王每日清晨必端書陰隲文一篇及先哲格言分送親友尺幅寸箋人爭寶焉



李學蓮字永魁一字星杠七星橋人乾隆丁酉舉於鄉教授里門講明實學以古道勗人邑侯楊清輪欽慕其人聘主吳航講席學規嚴肅功課周詳凡肄業者必令其各習一經逐日呈課功無稍閒清晨則端坐講堂與諸生談經史敦品行雖大寒盛暑不少輟一時執經者屢常滿戶外焚膏繼晷達旦書聲論者謂自有書院以來名師相望求其啓迪不倦實首推學蓮云

陳廷千以字行江田人性篤誠凡遇族中事必力持公道常曰吾族大人眾良莠不齊若不申明祖訓不免恃強凌弱致生事端因與族長嚴立規條有過必懲族人敬而畏之卒年九十後鄉鄰有事每相謂曰安得起陳廷千而挽此頽風也妻蔣氏亦壽登九十三

長樂縣志

卷十六

列傳五

三

鄉行

計同伉儷者七十年長子春雷乾隆癸卯舉人

邱玉山字有寬一字兩峯坑田人乾隆丁酉舉人教諭崇安嘗開館於明倫堂修學舍以處從遊之士及門如吳錫疇錫珪兄弟類能以儒術爲吏治所得學俸盡以置祭田並婚嫁其兄之子女絕不自私晚陞漳州府學教授以重聽歸治家嚴雖婦孺必繩以禮法每朔望到祖祠行香嚴戒子姪毋作非毋怙惡或不順卽以家法治之族之惡少平時恃強凌弱者自玉山歸咸斂迹焉年七十八卒有兩峯詩集四卷子國鈐嘉慶庚午舉人

陳學燧字丕樞一字金坡表賢村人乾隆丙午舉人挑取知縣改授教職氣度豁達博學工文與會城林芳春趙士泉陳煨林雨化林



志仁林賓日陳若霖魏光厚陳穎棠等爲三山十友往來甚契晚年鄉居處事明決鄉有曲直事輒求剖釋退無怨言乾隆五十八年同生員吳占鼉劉應芳等呈復濱澗二湖修隄蓄水以溉四里民田嘉慶閒又偕舉人李學蓮陳一鑑等督人夫開鑿陳塘官港四里得免淹浸之患者數十年里人德之卒之日嘆泣者遍里中學蓮輓以句云數所在莫能逃經濟文章終蓋一抔黃土義當爲靡不任鄰里鄉黨宜鑄六尺豐碑

陳魁襟字廷愷一字廣江古槐人父藩邑諸生治家持古道魁襟幼承庭訓友諸弟以仁勗子姪以約自飲食衣服及交游取與之節一秉忠信無流俗奢靡巧詐之習時與後輩談古近事識趣高遠淵然莫測而辭色閒往往有英偉氣鄉居數十年排難解紛不遺餘力有以豆觴啓釁者咸質成而心折焉終其身合鄉千百戶無有投牒訟庭蓋諸生而善格一鄉者族人庚煥爲之傳

黃觀營字萬達一字見洛青山下人嘉慶己巳歲貢生父邦柱植品勵行篤學工文以優廩生早卒營少失怙恃刻苦自勵躬萬敦觀書均在樨齒課之讀書撫之成立分肥讓甘怡怡無閒嗣仲氏萬敦授室而沒遺腹子春膏躬飲食而教誨之周恤備至愛同己子一門之內羣從同居男女數十人無有以嘻嗃聞者卽三尺童子亦知肅然起敬其所持者正也有鄰家子夜入其室竊取衣服觀營見之呼其來前溫語慰藉贈以錢文使之謀生其人卒悔而改



行又有陳姓某負重債將鬻童養媳以償觀營聞急往止之袖所立券焚於庭並贈以金令速完婚又徧告諸富家代乞緩追其盛德類如此迄今鄉評籍籍稱敦睦者必舉觀營爲法焉

陳澍霖字允雅一字秋田萬春長子弱冠以古學第一補邑諸生屢試優等食廩餼充嘉慶己卯 恩貢性孝友家貧竭力事親旨甘必具中年喪躬撫孤姪如已出授徒數十年因材誘掖以變化氣質爲尚常曰深沈精進可決遠到之才浮動飛揚詎是大成之器古人所以先器識而後文藝也故其所造多英雋士晚歲家居日以守分安命順時聽天八字格言勗子姪開有以訟事問者必開導勸息年七十七以壽終生平留心書法喜吟詠著有秋田吟草

長樂縣志

卷十六

列傳五

四

鄉行

二卷子四長際治字行陽一字寸耕天性淳樸不安交遊忠於爲謀視人事如己事童年失恃事父盡歡子贊宦豫每函諭其時事多艱勉圖報稱在鄉修祠廟砌橋路倡捐率作人尤服其大公云林繼僑字惠可一字柳村邑增生東隅人性醇謹敦禮讓課徒善誘貧而無力不取修金門下士多騰達者而好學不倦至老彌篤卒年八十屬纊時猶訓子孫以孝悌忠信素精篆刻工畫水墨葡萄蓋自陳天民高繼端後鮮有及者

高登峯字則繼流水人邑諸生砥節勵行及門士咸奉爲儀型邑侯楊清輪旌其門曰薰德善良蓋表實也與陳觀察學穎幼同筆硯勸善規過不以窮達殊其卒也觀察誄之曰浮生幻夢君先覺晚



節叢愆我孰規方正之風可以想見子元傑邑廩生行誼純粹有父風

鄭蔚然字序秀別字西林東隅人嘉慶辛酉舉人敦氣節勵廉隅辭受取與概表諸道雖一介必辨也與兄燦然弟代泮相友愛均負時名邑中公事如文武廟文洽浦書院射圃諸役昆季必倡捐董理其成而蔚然尤狷介不苟邑侯楊清翰素重其人常延訪事宜語不及私嘗值縣試其子列前茅戒勿入覆曰功名有定無涉嫌疑致損邑侯清德楊公益器重之其卒也哭之慟曰良友殂矣吾誰與規燦然字序登國學生代泮字序魯廩貢生

王嘉賓字孝龍一字主竹西隅人恩貢生性至孝人以王祥呼之

長樂縣志

卷十六

列傳五

聖

鄉行

遊閩縣蔡容門與陳庚煥交最深故行誼獨醇性好竹晚退居於碧蘚齋翠竹百竿古梅一本課子姪生徒循循守禮法人望見之不問而知爲嘉賓弟子所著竹溪筆記四卷未梓仲子道泰咸豐壬子舉人三子又安道光己酉副貢

黃觀潮字萬董一字畊心附貢生青山下人謙和謹慎勤學能文鄉先輩陳九鼎器之妻以孫女年逾冠受知於學憲陸錫熊補諸生性至孝晨昏必問視視同堂兄弟若同胞分多潤寡尤好施與每當春夏交減穀價平糶親鄰待以舉火者常數十家蓋身後六十年猶嘖嘖人口云

鄭成彪字其勝一字炳山邑庠生北湖人博學能文尤篤內行事親



備極色養及親沒躬營兆域祭必盡禮每值諱辰心常戚戚友愛諸弟共爨五十餘年始終無閒言治家嚴肅常集先哲名言有裨身心者書之座右爲子孫觀法生平不驚聲華自安義命設教家塾功課綦嚴視生徒無殊子弟從不計較束金士林重之卒年七十八

陳鍾濂字諸實一字約軒庚煥從姪少不羈稍長折節凝重若老成年十二三與叔庚煥論大學於樹下輒能洞貫明德體用大父挈遊九仙山適羣僧聚談彼法鍾濂推所聞朱子明德之說闢其謬羣僧驚嘆而去爲學不事涉獵鉅訂研精覃思務見其大性孝友世味紛華無所徵逐嘉慶辛酉成進士授國子監學正僉以需次長樂縣志

卷十六

列傳五

四

鄉行

將及留俟銓除鍾濂將母念切冒暑徑歸抵舍數月卒年三十四叔庚煥銘其墓

鄭孚誠字茂邦一字詹巖邑諸生西隅人家貧性至孝早喪父哀毀備至弱冠舌耕竭誠將母邑侯李鏐素有知人鑒下車觀風拔取第一廉知其事母孝月給米炭孚誠因執弟子禮請業之外不干一私李嘗寒夜步其館見案頭有訓徒律句八章訓子格言四則尤嘖嘖稱羨每語人曰鄭某尚德人也其見重如此

蔣之竹字與翠一字鳳庭與頭人年踰冠以古學第一補邑弟子員晚食廩餼舉優行天性强毅尚節概好直言遇有不平事輒侃侃力爭雖千百人不爲奪居庠序數十年片楮不入公門間有挾小



忿與鄉隣爭訟者必力爲排解嘗曰好鬪者亡身好訟者破家願以睦隣爲重毋傷和氣其剛正類如此生平友教生徒多所成就尤重氣義有故人子家貧無依助以膏伙課之讀書卒爲名流時論避之

陳有涵字丕泳一字液波東隅人職員少讀書精楷法晚尤蒼勁性謙讓與人交和易有禮雖三尺童子不狎也家故饒好周卹乾隆乙卯邑大饑散錢賑乏全活甚多道光癸巳又饑首倡平糶時家已乏穀轉稱貸以濟焉曾倡修九都桃枝湖人食其利邑侯楊清輪褚登咸重之稱爲長厚君子子九人孫曾林立多習儒業有聲庠序閒

長樂縣志

卷十六

列傳五

三

鄉行

陳盛世字康勉一字西河西隅人例貢兄弟五人序居次以善賈起家好施與尤篤友愛兄弟有不及者輒資給之復爲諸姪完娶道光初偕姪逢韶出錢四百貫重建祖堂祀支祖旁有房屋盡與服內貧乏者居之常課子姪曰種德勝積業宜儉不宜吝莫貪意外財莫傷手足義汝曹勗之卒年六十六

林觀成字沛然一字修厓邑廩生少穎悟好讀朱子小學書稍長專心制舉業得天崇魄力爲省會名師及門者多登科第年四十始返而精求諸四書參以五子近思錄及先儒諸語錄味道之腴勇猛精進永福余潛士聞縣何則賢皆稱其有一日千里之概與人交一本真實善必勸過必規過時事有不平者雖權貴前必侃侃



力爭又嘗舉吏治民風士習之要累書千餘言致故人之出仕者  
著有四書集註輯腋正學準修田警言芸窗自警史論皆未成書  
年五十二卒

林樹馨字孝冲一字在霄竹田人邑諸生肄業鼇峯與余潛士何則  
賢以氣誼相友重一日讀遊子吟潸然出涕曰吾亦人子也奈何  
別慈幃而虛名是戀遂歸養母雖有婢僕必躬親侍奉及母卒哀  
毀逾節忌日常哭泣事長兄如父不計貲財與人交尤見肝膽有  
陳某因貧廢學習雞頭業樹馨見其吐屬不凡邀歸同學卒成佳  
士

王偉堂以字行一字東升別字廉甫潭頭人淹貫經史工制舉業道

長樂縣志

卷十六

列傳五

四

鄉行

光丁酉舉於鄉性孝友教授生徒嚴重有威講貫之餘每諄勗以  
循禮守法故遊其門者率皆篤實謹厚不獨以能文稱也有羨某  
者家貧爲人牧牛每當偉堂講書必在門外潛聽久有所得卽能  
操筆學爲文偉堂奇之助以膏伙親爲指授卒以有成生平裹足  
公門不問外事其教澤所傳至今猶膾炙人口云

陳輝字位炯一字燎甫嶺南人家貧好學飭躬勵行老而彌篤性耿  
介不苟取而謙恭和易與人可親故鄉之子弟樂就範圍陳本巨  
族時有聯宗爭鬪事輝獨能約束族眾數十年鄉鄰賴以輯睦年  
七十九受知於李學使嘉端謁見慰藉再三云生非虛冒年歲者  
觀精神氣色是有內修之行其見重如此道光癸卯 欽賜副榜



壽八十九卒

高文騏字長揚一字質園職貢生好義急公嘗助修文昌宮武聖廟  
貢院義倉臺江書院萬壽橋洋中亭流憩第一亭鋪六柱洋龍嶺  
安民崎上杭街留飯鋪湯房巷路坊口爲下游之所文騏倡捐成  
橋行人頌之他如敬節堂團練局育嬰施棺等事俱不惜貲財以  
成其美辛丑春大府議修省城垣文騏捐制錢一萬緡葺工後  
加知府銜暎夷啓釁文騏捐白金二千兩助軍需奉 旨加二級  
又捐洲田二百餘畝以供萬歲寺燈油魏敬中爲撰碑文勒石以  
紀之蓋好行善事足爲殷戶勸云子彬騰壁銑皆官訓導承父志  
砌龍門埠頭石道行人利之

長樂縣志

卷十六

列傳五

聖

鄉行

吳觀國字萬統一字光賓京溝人質魯而嗜學刻志勵行手不釋卷  
道光丙午舉人友教生徒無論材質高下胥勗之以勤蓋以身教  
也鄉鄰中有爭訟必婉言曲導賴其排解者甚多尤留心水利濱  
澗二湖久爲豪姓侵佔觀國鳴之官慨然以修復爲任每遇旱潦  
巡視啓閉必自躬親雖甚雨烈陽弗恤也已酉計偕北上歸卒於  
延平途次鄉父老聞之皆爲流涕

鄭開倫字漢溪職監生雲路村人遷居會城性友愛好施與兄弟五  
人皆賴以提攜成立族中數十餘戶其尤貧困者恒待以舉炊焉  
里閭善之



文苑

唐

卓雲河南人乾甯中第二人及第歷官淮南節度作未明求衣賦駕在華州試問善如扣鐘詩時稱名士舊志

宋

鄭洙字教生一字東山其先侯官人徙居於十三都柯林山下景祐

間擢三禮科仕至虞部郎中終金紫光祿大夫初洙赴試陳襄贈

詩云滎陽才子東山客滿腹精神太英特揆天詞藻駕曹王炙地

聲華壓元白蓋其未仕時已見重於士林如此祀郡庠鄉賢祠舊志

林通元祐初文廟頽圯久莫能建通憂之乃作縣圖經鬻之得錢二

長樂縣志

卷之十六

列傳五

四六

文苑

十萬富民皆資助焉遂成廟學邑之有志昉於圖經通登鄉薦工

詩有詩集

舊志

林桷字子長洧熙初任姑孰教授為太守楊愿作姑孰志五卷

舊志

陳有聲字廣宗嘉定進士尉上高時歲豐訟簡吏民安之前此邑士

罕知聲律有聲選詩賦百餘篇教以體裁上高詞賦遂甲他邑

舊志

姚勉字汝勛一字瑞峯能舉七世孫寶祐癸丑正奏第一人授翰林

院編修終朝請大夫勉性敏下筆如流對策萬餘言悉稱上意著

有雪波集行世

舊志

明

陳海仁字思允江田人詩學精深洪武乙丑進士拜中書舍人擢給



事中立朝敢言文章政事望重一時

舊志

林慈字志仁與頭人力學稽古嫻於文詞嘗與陳登高棟王恭鄭定

輩往來唱和洪武中以明經薦任本縣訓導國子博士有詩集

舊志

鄭定字孟宣祖閩縣人居於縣東洪武閒徵為延平府學訓導永樂

初遷國子助教善草書工文詞號浮邱生有澹齋集

舊志

陳登字思孝仲進子為人諒直洪武中以儒生薦授羅田縣丞調蘭

溪浮梁善文詞尤工篆籀擅名海內凡周秦以來石刻殘缺無可

考者皆能辨之永樂中以薦召入翰林預修國史授中書舍人入

直時待詔吳郡滕用亨負重名見其後進忽之屢眾辱登登不較

也一日辨難許氏說文登隨問條答如指諸掌用亨乃愧服宣德

長樂縣志 卷之十六 列傳五

畧 文苑

閒卒於官有石田吟稿

舊志

陳全字果之江田人永樂丙戌進士第二人授翰林編修永樂大典

書成召赴行在修四書五經性理大全書成擢侍講權翰林院事

謙和篤實慎密公勤著有蒙菴集祀鄉賢

舊志

高廷禮初名棟字彥恢自稱漫士龍門人先姓張以祖隆後高氏因

姓焉永樂初與王恭皆布衣召入翰林為待詔遷典籍卒事親孝

謹與人交無智愚新故益然如一博學能文尤長於詩書畫時稱

三絕嘗總唐人詩揚扝上下之自正始至旁流為十餘品然其宗

旨則歸於開元天寶之間為品彙九十卷拾遺十卷正聲二十卷

談者謂唐稱詩三百年風調正變大較如此又著有嘯臺集木天



清氣集玩字文原

高氏自序其品彙略曰有唐三百年詩眾體備矣至於聲律與象文詞理各品格高下之不同

略而言之則有初唐盛唐中唐晚唐之不同詳而分之貞觀永徽之時此初唐之始製也神龍以還洎開元初此初唐之漸盛也開元天寶此盛唐之盛者也大歷貞元此中唐之再盛也下暨元和之際此晚唐之變也降而開成以後此晚唐變態之極而遺風餘韻猶有存者焉又曰遠覽窮搜審詳取舍以一二大家十數名家與夫善鳴者始將數百校其體裁分體從類隨類定其品目因自別其上下始終正變各立序端以弁其端爰自貞觀至天祐通約六百二十人共詩五千七百六十九首分爲九十卷總題曰唐詩品彙又自序其唐詩正聲曰詩者聲之成文也情性之流出也情感於物發言以爲聲故感有邪正言有是非惟君子養其浩然存其真宰平居抱道與時飛沈遇物悲喜觸處成真咨嗟咏歎一出於自然之音可以被律呂而歌者得詩之正也又曰因編唐詩品彙一集慮博而寡要雜而不純乃拔其尤彙爲此編題曰正聲者取其聲律純完而得性情之正者也

陳亮字景明沙堤人故元儒生也其爲詩冲淡悠遠有陶孟之致洪永中累詔郡縣徵遺逸或推轂亮亮不應作讀陳搏傳詩以見志

長樂縣志

卷之十六

列傳五

哭

文苑

築小樓山中購四方名書藏之每與名士王恭高棟爲文酒過從暇則泛江歷山投上方蘭若尋僧問偈意豁如也山中爲九老社以終著有滄洲集儲玉齋集其詩軼不盡傳舊志

王恭字安仲一字皆山樵者祖閩縣人居邑之沙堤永樂丙戌年六十三以儒士薦至京預修大典己丑試詩優等授翰林院典籍有

白雲樵唱草澤狂歌鳳臺清嘯與同邑鄭定高棟陳亮流寓周位黃位侯官黃袞唐泰福清林鴻永福王僑齊名閩中稱十才子舊志

高淮字泰仲二都龍門人永樂丁酉舉人通三禮諸生時代邑合作諭俗文爲時所稱以鄉舉入都姻舊多居要地淮自守不往謁居國學數歲以祖母百齡父母亦年高歸養不復出自稱竹所老人



著書三十餘卷解大紳王皆山馬彥聲爲之序善畫山水古澹絕倫時共珍之其族子景度亦工山水維端工葡萄省志編入方伎舊志

李叔玉東隅人宣德乙丑進士官至惠州知州慷慨好義博學工詩

有梅菴集梅花百詠舊志

謝汝泮字濱芹杰從子性廉潔曠達工詩歌行尤入妙著有顧行愚

言木爲之弁舊志

林憲護字淑衍二十都松下人高才博學工書能文天啓乙丑會試

第三名成進士授中書科舍人欽命巡查閩浙粵三省軍政邊境

肅清舊志

長樂縣志 卷之十六 列傳五

四九 文苑

梁珪字至鉉一字雪園春暉子能讀父書年十五補弟子員食廩餼

文詞拔萃雅有器識乙酉年逾冠領恩貢戊子後隱祖里繩世業

體素弱啞於口惟喜談忠孝節烈事久之北遊齊魯燕趙酒酣耳

熱恆慷慨悲歌以寫其不平之氣遇人開心見誠無所隱諱年未

及中壽卒著有江田草楚遊草江西遊草雪園詩參謝杲節義錄

國朝

程應辰字伯樞一字蕉山十五都漳港人穎敏能文尤善詩歌嘗授

徒永福黃編修家盡得其學順治戊戌進士補平南令深得民心

旋以老告歸囊橐蕭然著書甚富盡散失僅存長樂形勝一篇舊志

吳道來字子紱十二都感恩人籍侯官順治庚子鄉薦第一丁未進



士授中書文學德行並優著有鄴城百詠卒於官子士宸字翰光  
學術浩博殊有父風通志府志作侯官今從賀志

王穎如字哲開膺祺弟資性穎異氣度宏遠年十三隨董應舉遊鎮  
海樓傲王勃作滕王閣序頃刻數千言語極壯麗與兄相友愛著

有日記天籟集三十卷及孝經頌贊二樓紀勝諸篇賀志云穎如實梅花所人

府志誤入閩縣

陳騶字伯騶江田人性聰穎過目成誦幼即工詩與三山黃晉良許

友相友善尤見賞於侍郎周亮工中年縱遊燕齊吳越著作益富

與攜李曹溶長洲尤侗稱莫逆交為人孝友晚偕兄澣隱溪湄所

著有雪鴻堂詩文集十卷其最傳者有南雅堂紀事詩金陵懷古

長樂縣志

卷之十六

列傳五

辛

文苑

諸篇澣字伯熊亦有詩名大司馬龔芝麓稱其淵雅簡潔有仁孝

之風時人共推重之恆以二伯比二方云舊志

林日菀字道雨弟鼎復字道極同為邑諸生善屬文矩矱一遵先輩

康熙初均以平海功議敘日菀通判山西平陽著涵秋醫方鼎復

通判江南常州著華鄂堂詩集人推重之舊志

歐陽士超字允特邑諸生十六都人學行醇粹調遷往復惟以經史

自隨尤精易學著有周易本義刪補便讀二卷舊志

陳漢章字可雲一字天于十四都人性好學十七補諸生邑名士多

出其門既耄口授手披無閒寒暑著作甚富有天遊居文集行世

三調遷賦尤有風雅之遺舊志



鄭冕字子偉二十都人性孝友康熙甲戌進士授湖廣鄖合興水利除虎患治績有聲擢刑部主事凡獄囚飲食醫藥必親視終其官無病死者晉禮部郎中視學廣東秩滿守原官所拔多單寒士著有藏山堂集狴犴晨鐘拜石堂詩集華胥內外集偶筆詩集粵東文誥集秋心集二瞻真稿舊志

朱靜字子定十五都漳港人康熙癸未歲貢端方古樸不妄發一言遇三尺童子亦謙遜授徒講學卽盛暑必衣冠危坐遊其門者率礪廉隅卒年八十餘著述甚富藏於家舊志

陳範字朝箕一字鑄巖江田人遷會城少穎異學有淵源文脫稿紙貴一時游其門者多獲雋康熙辛卯領鄉薦公車屢蹶與孫勳吳

樂縣志 卷之十六 列傳五 五 文苑

士玉稱莫逆交著有四書講章二聞堂集行世選建陽教諭未之

官卒舊志

陳崧字書昂康熙丁酉副貢性孝友好施與口不言人過博雅工文爲經師數十年負笈者屢滿戶外生徒取科第如摘髭而崧獨困場屋需次泰甯教諭檄甫至卒年七十九舊志

陳子欽字克器一字鍊雲江田人先世自江山令仲進中書登以下代有傳集父崧生郡諸生丁鼎革之秋不求聞達家積書萬卷惟閉戶課子子欽承庭訓徧讀家所藏書才思渙發長益肆力於詩文爲江左紀映鍾洛中周亮工所贊賞以貢入都應廷試大學士明珠聘爲教習子欽辭不就珠單騎枉顧贈狐裘白金卻弗受卽



拂衣歸一時都人士咸高其節所作文與古樂府皆不傳惟鍊雲集八卷其子玉鼎梓以行世大抵多故宮禾黍之感寒如郊瘦如島而風致飄然實得力於晉之五柳翁者倘遇知音當能辨之

吳第字序充一字純齋雍正癸卯歲貢孝友勤學至老不輟誘掖後進皆名重一時著有綱目俟論五經俟論綱目地輿便覽若干卷

舊志

黃典字振儀一字鳳村犀村人有夙慧過目成誦擅神童譽弱冠日可成文二十篇皆中選為人磊落不修邊幅氣量過人雍正癸卯舉於鄉甲辰成進士令山東冠縣廉聲大著邑界大名回子營民向受回害典立法勸諭遂相安旋因病告歸總督田文鏡憐其才

長樂縣志

卷之十六

列傳五

至

文苑

強留半年後知其支床不起始令行甫至聞界卒囊橐蕭然

舊志

吳九敘字瞻侯士宏子雍正癸卯副榜甲辰舉人孝友天植兄弟自相師友足跡所至名流皆倒屣尤工詩古文辭書法亦妙一時公車八上數奇不偶以疾卒京邸士論惜焉

舊志

謝紹鼎字公大一字怡園兆麟子孝友嗜學試輒冠軍督學沈涵知縣衛良佐咸器重之雍正丁未歲貢授崇安訓導署教諭課士精勤倡修文廟著有四書辨訛春草堂詩劇卒年八十四子人騏邑庠生克繼父風母老病親侍湯藥衣不解帶者累年父卒署中躬為扶襯歸里時述父訓課其子孫

舊志

吳化字子才一字希軒二十四都人性孝友好讀書從遊甚眾就正



者日不絕人安貧樂道為當事所器重雍正己酉舉於鄉著有希軒文集行世舊志

王思猷字宗英一字莫瀾東隅人篤學能文汲引後進知名士多出其門生平砥節勵行以優舉士林重焉屢薦數奇乾隆壬申始舉於鄉兩上公車齋志以歿人皆惜之著有漱玉集四卷舊志

陳永書字茂亮一字寅軒表賢村人乾隆戊午副貢天資敏悟過目成誦幼從王思猷游思猷語人曰陳子異日所造不可量也為文高視濶步與黃典林瓊蕤相友善游學會城時稱吳航三才子邑侯賀世駿慕其學聘修邑乘家藏書甚富而搜羅鈔錄殆無虛日著有事類數目攷二十卷詩書條貫三卷行世門人盧遂鄭兆焯

長樂縣志 卷之十六 列傳五 文苑

等為之傳子道極乾隆乙酉科副貢著有葩經要解六卷藏於家善墨畫尤工白菜牡丹人爭寶之

林振采字久苞一字儀九瓊蕤次子乾隆癸未會魁瓊蕤官數年歸無長物惟積書十數萬卷振采與兄振品盡讀家所藏書淹通貫串探其源流窮其奧蘊下筆沛然如決江河一時名宿如鄭天錦張甄陶皆折節與交邑令賀世駿聘修縣志身後著述散佚無存嗜古者慕其學博才高而慨其後不傳也胞姪觀曾字述謙一字省吾性豪飲書學懷素得其神妙年七十八以諸生老後亦無傳

謝瑾字聘修一字懷溪紹鼎孫乾隆庚辰舉人歷任建甯漳浦彰化浦城臺灣教諭崇尚樸學啓迪有方擢雲南元謀知縣戢健訟清



積案教條懇摯有儒吏風公餘之暇嘗手鈔二十一史訂疑補漏惜身後散佚不全今稿存者尚有偶見集三十六卷懷溪詩話八本分天地人物四門逐事纂輯皆淵雅可傳

陳奇銑字茂鐘一字曉幢逢泰次子才高學飽器識不羣乾隆戊子舉於鄉受知劉諸城相國目爲第一人七上公車五薦不售以家貧親老選山東富國場鹽大使閒曹偃蹇常鬱鬱不得志遂解官歸作落花詩百首以自況居林下十餘年足不出戶庭唯怡情詩字字學二王詩近七子著有鑄硯齋詩集二卷寄託深婉知非牢盆俗吏所能淹也

陳萬春字孟璜一字新園青橋人邑諸生屢試優等家貧舌耕自給

長樂縣志

卷之十六

列傳五

五

文苑

一時知名士如林調陽林芝芳黃金鑑黃日華輩皆出其門其他蜚聲文苑者不一而足生平湛深經術年八十餘猶手不釋卷晚歲家居率以排難解紛爲事接人推心置腹尤敦孝友鄉里稱善人卒年八十四著有詩經編義八卷子澍霖澍雲自有傳

王元麟字伯瑞一字芝田乾隆丁酉拔貢容儀豐偉健嗽逾恆性嗜古熟左氏傳督學吉夢熊賞其文有經籍光喜誦永福黃任秋江集詩爲之注釋廣證旁搜屢易稿始成書自言一生精力畢萃於

此晚選松溪教諭旋引疾歸卒年九十子亨樾嘉慶戊寅舉人

通志

陳玉華字昌泰一字榕村錫璋子少穎悟善屬文弱冠補弟子員肄業鼇峯與陳烺林志仁輩作文字交名噪遠邇乾隆戊申舉於鄉



需次浙江署紹興同知僅四十日以憂歸生平講學會城執經者常七八十人因材造就皆成英雋論者謂玉華雖無著述而其教澤及人遊其門者或以經術稱或以文章顯實爲一時老名宿云林宗洙字明浚一字魯水父芳乾隆己酉舉人司訓松溪勤於課士宗洙年十二通十三經陳學使嗣龍拔冠多士尋三試科歲皆第一肄業鼇峯爲主講鄭光策游光繹所器重與林文忠廖文恪均以年少負文名制府汪志伊奇之公餘輒令入署課所業賞書籍法帖及先儒理學書性恬退不慕榮利嘉慶丁卯年甫冠舉於鄉晚截取知縣不赴選惟肆力於各經註疏辨析淹貫旁及史漢文選諸大家文集陳壽祺太史以經學名天下嘗心折焉延課其諸

長樂縣志

卷之十六

列傳五

五

文苑

子惜生平不喜著述韞所心得者抱璞以終弟宗澤道光乙酉舉人亦績學不仕如其兄

梁運昌初名雷字慎中一字曼叔嘉慶己未進士改庶吉士散館授編修性嵯岬睥睨一世視富貴人尤嫉之自在史館及家居數十年寥寥寡合人亦聞而避之不樂與之交生平學博識超著作甚富有秋竹齋詩文集陳氏古音考訂讀詩考韻新譜四書偶識史漢眉評說文小箋難經發明兩漢魏晉宋齊詩式全唐詩隨筆唐人風格集杜園說杜韓詩細蘇詩鈔等集

梁章鉅字闕中一字茝林晚自號退菴祖居江田嘉慶壬戌進士改庶吉士散館以主事用考充軍機章京京察一等授湖北荊州府



累官至江蘇巡撫敷歷中外垂四十年文章經濟昭著一時公餘之暇網羅文獻手自撰述東南名下士如鈕布衣樹玉郭明經鑿董明經士錫朱孝廉綬姜文學臬楊明經文蓀皆在館下又師大興翁閣學方綱儀徵阮相國元辨論攷證貫弗周析著有論語集註旁證二十卷孟子集註旁證十四卷夏小正經傳通釋四卷倉頡篇校證三卷經塵八卷古格言十二卷三國志旁證三十卷文選旁證四十六卷 國朝臣工言行記十二卷樞垣記略十六卷退菴隨筆八卷退菴題跋二十卷續跋二卷退菴文存二十四卷藤花吟館詩鈔十二卷退菴詩存二十四卷續存八卷東南嶠外詩文鈔三十卷閩詩鈔五十卷閩川文選五十卷三管英靈集五

長樂縣志

卷之十六

列傳五

姜

又苑

十八卷此犖犖之大者他如制義叢話楹聯叢話及諸脞說詩話之屬尚多不悉著子逢辰字聿磐一字吉甫道光辛丑進士書法神似顏柳而隸書尤勝名重一時

陳玉銘字希贊一字潼溪石門人嘉慶甲子年逾冠以縣試第一補諸生膺鄉薦乙丑聯捷進士授翰林院編修歷官國子監司業司經局洗馬癸酉辛巳典試湖北山西丙子鄉試分校北闈得陳殿撰沆劉宗丞誼李太史之瑄劉制府源灝皆知名士壬午考差爲同官株累罷歸今所存者惟慎餘堂文賦一卷試帖百餘首皆乙丑後館閣作也

柯龍章字宗起一字儀周柯百戶人遷會城嘉慶丁卯優貢戊辰舉



人歷任汀州府訓導永定學教諭掌教龍山海東崇文各書院生  
平工制舉業湛深經術於禮經尤多所發明著儀禮箋註三十卷  
未梓有儀周文稿行於世

黃一桂字國雍一字薌林觀營子郡廩生少承家學不屑屑章句長  
從同邑陳玉華孝廉游益潛心經學陳語人曰及門中講求實學  
者黃子其最也家藏書籍朱墨殆徧晚年取先文肅公志堅思苦  
之義名所居曰思苦自爲之記大旨謂天下之理惟思能通吾人  
之心惟苦能入故思者聖功之本苦者通微之幾也其刻厲如此  
尤喜左傳嘗采舊說傳以心得輯爲一書名讀左廣義蓋丹陽姜  
上均先有讀左補義茲復從而推廣之也議論創闢皆足發前人

長樂縣志

卷之十六

列傳五

五

文苑

所未及思苦之學於此可見次子鶴三字景樹一字聲亭道光庚  
子亞魁讀父書有文名署江西安義縣知縣以勞勩卒於官

玉溱字利杰一字成旗嘉慶癸酉拔貢己卯舉人大挑知縣改補福  
鼎訓導少工詩精楷法謝徵君曦奇賞之妻以女孫及司訓於福  
鼎喜獎才僑遇士困乏輒周卹之而自忘其貧著有韻學指南足  
雨宦詩鈔福鼎方言左賦行於世其未梓者四書筆記詩釋人說  
文音聲譜文選音韻經典釋文校證壽六十四

王登三字道起一字槐卿感恩人性聰穎少時卽能下筆作驚人語  
弱冠遊會城文名籍甚汪志伊制府評其文曰峯鋒風日爲八閩  
才子年五十餘始領道光乙未鄉薦素善講貫常卽眼前事推出



絕大道理凡秦漢八大家之文均能溯其源流探其旨要遊其門者如鄧慶恩方伯周瑞圖郡守其最著也尋挑取河工任直隸無極知縣留心民瘼有政聲以勞勩卒於官生平著述散佚無存

馮承基以字行一字彌甫鼎高曾孫道光庚戌進士卽用浙江甯抵省丁內艱歸數月以毀卒初承基三歲生父與嗣父相繼歿門祚衰微兩節母及祖母曾祖母愛如掌上珠年十六七始知學匝歲卽能通七經不二年盡讀家所藏書下筆沛然累千言不踰先輩繩尺道光己亥年逾冠舉於鄉自是奔走公車常留京邸與同鄉何冠英林廷禧林壽圖爲文字交惜豪放縱飲而天亦不與以年俸折節以底大有成也其師陳宗英爲編遺集有駢體四卷古今

長樂縣志

卷之十六

列傳五

五

文苑

詩六卷藏於家



隱逸

宋

劉世修字景周嘗授承信郎監行在贍軍激賞庫尋棄歸專意黃老之術建得閒堂旁構數亭日與文人羽客觴咏談元其閒妻兄陳自強諂事韓侂胄不數年至宰相以有道辟世修力辭不就因號慧觀翁後自強敗世修不預其禍年八十卒

舊志

維仲失其姓紹興閒耽書樂道晦迹林泉詔三辟之竟不起

劉志

元

林清字以甯阜山人泰定閒屢辟不就賜旨劄云儒士林以甯道貫萬殊年高七袞明經修行不求聞達於當時勸士崇賢宜爾贊揚

長樂縣志

卷十六

列傳五

五

隱逸

於盛世賜號阜林梅隱處士

舊志

陳仲文字奎甫元季隱居山林號樂樵子嗜學能詞章孝友尤篤嘗與族子潔建書室於歸橋林壑中以程朱之學倡其鄉人曰義學

府志

陳東字景暘沙堤人少雋敏篤學經史百家及釋氏書多所研獵工詞賦比長浮游沅湘吳越閒諸所游覽輒形歌詠或至禪房道榻凝香默坐迥如也余郡同知郭履辟為郡邑儒學辭不就僉憲趙承禧以遜跡邱園不求聞達薦東曰吾既不求聞達乃復名塵薦剡去之隱居足跡不至郡城著有雜文并詩集

舊志

明



林紹字滄裕能詩尤工五七言長律永樂時邑人王堅王恭交章薦於朝部檄徵之不起有林泉清響集舊志

陳漢臣名留孫以字行號藍田子南田人工詩文為世名儒嘗辟為南安教諭辭歸有榕溪集學士古田張以甯為之序舊志

林敏字汝學一字漢孟號瓢所又號位冥子又號青羅山樵羅田人宋林簡肅之裔資性穎悟讀書過目成誦為詩刻勵清新與周位

黃位輩締詩社永樂五年以人材薦不就卒舊志

鄭文霖字汝眾號耽犁子邑西永甯坊人好善樂道洪武中嘗應辟不仕與周位鄭定高棟王恭陳亮諸人賡咏尤耽於耕故號耽犁

嘗曰吾拙於進取惟犁鋤是耽安於蹇窮惟稼穡是務方吾犁之

長樂縣志

卷十六

列傳五

本

隱逸

在手也茫乎其無思熙乎其自恬不啻執圭秉璧之榮而運斤游刃之適也所著有耽犁子一卷榜眼練子寧為之賦狀元張顯宗為之跋裔孫位工詩畫有祖風舊志

陳本字叔固全之子性耿介善詩文敦尚古道不慕榮名隱居江田與聞人逸士吟咏有詩文若干卷劉志

李仕黼字士殷號泗峯邑西人望隆學校不求聞達教人以孝弟修身為本四方名士多出其門家甚清卻貧士贄禮父母兄弟并外父母事生送死皆資之毫無所吝學舉德行首推焉著五經纂要當貢而卒祀鄉賢舊志

梁春暉字時皇號淑三江田人明諸生隆武乙酉領恩貢明亡杜門



不出授徒講學終其身有雲龕遺稿一卷雲龕山卽龍龕山在縣南干溪潭上有歸雲閣望海亭香鑪峯諸勝春暉晚年卜居其地故以名集其生辰識感云不堪思往事未易說完人又除夕云三閒破屋完吾事一片斜陽照此心其志事可以想見參江田梁氏詩存張振玉號梅如東隅人明諸生性孝友尚氣節與同郡吳大正素相友善明亡大正死之玉哭臨甚哀曰吾爲親之故偷生人閒冥冥之中負此良友自是隱居鼇山不入城市談及時事輒義形於色

參張氏家譜

謝杲肇淞季子明諸生自號青門老人少隨父授書見忠臣孝子義夫節婦傳輒流連向往之壯歲值明亂避地幽隱凡山高水深人

長樂縣志

卷十六

列傳五

本一

隱逸

跡罕到之處靡不遊歷以舒憂憤甲申後明社旣屋棄儒巾杜門掃軌念世受國恩偷生人世恆涕泣不自己迨庚戌春浪迹北遊自吳楚以及齊晉燕趙諸名區嗟河山之改色望宮闕而徘徊又歛歔淚下者久之庚申秋自吳門抱病歸遂不復出凡閩中殉難苦節及潛身沙門絕意進取者若干人概爲傳論成節義錄二卷其已經贈官易名及身尚未死者皆弗錄其自序略曰吾職非史官志在發潛德之幽光不忍其同湮沒於寒煙蔓草而已連江陳元龍爲之序曰老人家學淵源吾固知太史之有子長叔皮之有孟堅衡泌樂饑其亦困而不失所亨乎

陳名賓號際伍邑廩生雲路人敦名節善屬詩文著有理學眞僞論



書經講述知縣夏允彝雅重之常贈以七言古風詩別見時海氛起

與長子副貢鳴瑜次廩膳生鳴琪謝試事築室松坪偕隱以老

國朝榜眼吳文煥懷以詩云種樹種松柏論文論古人松柏節不

改古人德不湮御史陳書為之傳舊志

國朝

董捧日十二都古槐人邑諸生通易理精卜筮雅不與俗近中年即

不應舉結草廬於董奉山嘯傲烟霞悠然也舊志

高文字克斌大宏里人喜讀書不樂仕進小築數楹蒔花種竹每遊

山水竟日忘歸著作多不盡傳於文石志見一斑焉舊志

長樂縣志

卷十六

列傳五

全

隱逸



流寓

宋

陳襄字述古侯官人慶厯閒嘗游靈峯寺題五律於壁上永樂時墨

蹟猶存舊志

方元宗字道輔莆田人少與伊川游伊川遺書云足下非混俗之流

其志道之士仕至宣議郎威武軍節度推官乾道中嘗游靈峯山

學者款留論道久之歸雲洞並龍泉寺石刻猶存舊志

徐鐸宋熙甯丙辰狀元常游長樂築室於錦陽居焉今其地為毓麟

宮仍祀木主於旁舊志

李綱字伯紀邵武人建炎閒丞相為言者論罷紹興初許自便居福

長樂縣志

卷十六

列傳五

六十三

流寓

州尋移居長樂五年起用觀文殿學士除江南西路安撫制置大

使兼知洪州六年准告兼營田大使旋引疾乞罷八年還居長樂

後三歲卒於福州寓舍年五十八合葬郡之懷安山府志

朱熹字元晦建陽人因避學禁寓邑之二都龍門後人名其所寓樓

曰紫陽既復寓於方安里之龍峯巖里人劉砥劉礪兄弟從而受

業焉今其地稱為晦翁巖舊志

陸秀夫張世傑德祐末楊淑妃偕弟亮節負益王昰廣王昺播遷温

州秀夫以兵會之因與張世傑陳宜中楊亮節奉二王航海自礪

澗歷王母礁礪澗文石澗入閩安鎮舊志

明



周位字又位一字微之閩縣人嘗令數蒼頭肩書數千卷縱游四方來邑寓龍門高棟家曰吾益友也與居十年辭去盡棄其書曰在吾臂中矣後徵任禮部員外郎舊志

緜纓子甯裔孫與弟綺竄寓長樂萬厝間纓子思祖手哀子甯遺事

伏闕上書請卹典大學士葉向高布政謝肇淛侍郎董應舉各為

文以送其行府志

錢肅樂四明人崇禎丁丑進士官至吏部尚書常托跡於三寶西石

麓峯東林諸勝所至賦詩居數年後卒海島中舊志

國朝

蔣垣字用崇其先本邑人久遷省會康熙壬子由侯官籍舉於鄉值

長樂縣志

卷十六

列傳五

畚

流寓

耿逆變逼授僞職垣服藥毀形不告妻子逃與頭托星卜治生事

平將歸語族弟用乾曰吾半生心血纂集八閩理學一卷鈔以示

後不無少補後付梓舊志者爭購之今用乾家猶有遺稿案既

本邑人則止是歸里隱遯耳未可日流寓今姑仍舊志而附論於此

